

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা।

সংবাদ গতিধারা

ঢাকা, সোমবার ২৫ মে ২০১৫, ১১ জ্যৈষ্ঠ ১৪২২

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। অবৈধভাবে বিদেশগামী ও দালালদের বিরুদ্ধে ব্যবস্থা নেওয়া হবে : প্রধানমন্ত্রী
- ২। গুরুত্বপূর্ণ প্রকল্পে চীনের সহায়তা কামনা প্রধানমন্ত্রীর
: দ্বিপক্ষীয় সম্পর্ক জোরদারে বাংলাদেশ-চীন ছয়টি চুক্তি স্বাক্ষর
- ৩। এবার মালয়েশিয়ার জঙ্গলে ৩০ গণকবরের সন্ধান
- ৪। মানব পাচার বিচারের জন্য ট্রাইব্যুনাল হচ্ছে সাত বিভাগে
- ৫। ধর্ষণ ও হত্যার হুমকি রোধে দ্রুত ব্যবস্থার তাগিদ সংসদীয় কমিটির
- ৬। বাজেটে বিশেষ তহবিল চান আবাসন ব্যবসায়ীরা : অর্থমন্ত্রীর সঙ্গে প্রাক-বাজেট আলোচনা
- ৭। ভারতে বাংলাদেশি গৃহবধূকে ধর্ষণ ও হত্যার ময়নাতদন্ত প্রতিবেদন দিতে
পুলিশকে হাইকোর্টের নির্দেশ
- ৮। রাজধানীর মগবাজারে দিনদুপুরে গুলি চালিয়ে ৩৩ লাখ টাকা ছিনতাই
- ৯। দেশের বারো জেলায় কালবৈশাখীতে নিহত ৮, আহত অর্ধশত
- ১০। বিদেশ ফেরত শ্রমিকদের কর্মসংস্থানে চাকরি মেলা
- ১১। দেশে সোয়াইন ফ্লু শনাক্ত, চাই জরুরি পদক্ষেপ

চলমান পাতা/২

১। অবৈধভাবে বিদেশগামী ও দালালদের বিরুদ্ধে ব্যবস্থা নেওয়া হবে : প্রধানমন্ত্রী

প্রধানমন্ত্রী শেখ হাসিনা অবৈধভাবে সাগর পথে বিদেশ যাওয়ার চেষ্টাকে মানসিক অসুস্থতা হিসেবে আখ্যায়িত করে বলেছেন, তারা একদিকে নিজেদের জীবন বিপদের মধ্যে ঠেলে দিচ্ছে, অন্যদিকে দেশের সুনাম ও ভাবমূর্তি ক্ষুণ্ণ করছে। তাই যারা মানব পাচারে জড়িত তাদের পাশাপাশি যারা সাগর পাড়ি দিয়ে অবৈধভাবে অভিবাসনের চেষ্টা করছে তাদের বিরুদ্ধেও শাস্তিমূলক ব্যবস্থা নেওয়া হবে। এক্ষেত্রে প্রয়োজনীয় ব্যবস্থা গ্রহণের জন্য তিনি সংশ্লিষ্টদের প্রতি নির্দেশ প্রদান করেন। গতকাল ২৪ মে রোববার সচিবালয়ে শ্রম ও কর্মসংস্থান মন্ত্রণালয় পরিদর্শন ও মন্ত্রণালয়ের কর্মকর্তাদের সঙ্গে মতবিনিময়কালে প্রধানমন্ত্রী এসব কথা বলেন। সূত্র-ইত্তেফাক (পৃ.১,ক.৫), জনকণ্ঠ (পৃ.১,ক.৩), প্রথম আলো (পৃ.২,ক.২), ইন্ডিপেনডেন্ট (পৃ.১,ক.৫), নিউজ টুডে (পৃ.১,ক.২)।

২। গুরুত্বপূর্ণ প্রকল্পে চীনের সহায়তা কামনা প্রধানমন্ত্রীর

: দ্বিপক্ষীয় সম্পর্ক জোরদারে বাংলাদেশ-চীন ছয়টি চুক্তি স্বাক্ষর

প্রধানমন্ত্রী শেখ হাসিনা রূপকল্প-২০২১ সফল করার লক্ষ্যে বাংলাদেশের দ্রুত উন্নয়নে গুরুত্বপূর্ণ অগ্রাধিকারমূলক প্রকল্পগুলোতে চীনের আরো সমর্থন ও সহায়তা কামনা করেছেন। গতকাল ২৪ মে রোববার গণভবনে প্রধানমন্ত্রী শেখ হাসিনা এবং চীনের সফররত উপ-প্রধানমন্ত্রী লিও ইয়ানডং এর বৈঠক হয়। বৈঠকে প্রধানমন্ত্রী এ সহায়তা কামনা করেন। এ সময় বাংলাদেশের উন্নয়নে প্রধানমন্ত্রী শেখ হাসিনার নেতৃত্বের প্রশংসা করে চীনের উপ-প্রধানমন্ত্রী বলেছেন, মধ্যম আয়ের দেশে উন্নীত হওয়ার লক্ষ্য পূরণে তাঁর দেশের সহযোগিতা অব্যাহত থাকবে। এদিকে বাংলাদেশ এবং চীন সরকারি ও বেসরকারি খাতে দ্বিপক্ষীয় সম্পর্ক জোরদারে ছয়টি চুক্তি স্বাক্ষর করেছে। এর মধ্যে তিনটি হচ্ছে সমঝোতা স্মারক (এমওইউ), দুটি সহযোগিতা চুক্তি এবং শিক্ষা, গণমাধ্যম ও বাণিজ্য খাত-সংক্রান্ত একটি বিনিময় নোট। সূত্র-ইত্তেফাক (পৃ.১,ক.৭), প্রথম আলো (পৃ.২,ক.৮), জনকণ্ঠ (পৃ.১,ক.২), ইনকিলাব (পৃ.১,ক.৫), নিউজ টুডে (পৃ.১,ক.৬), ডেইলি সান (পৃ.১,ক.৬)।

৩। এবার মালয়েশিয়ার জঙ্গলে ৩০ গণকবরের সন্ধান

থাইল্যান্ড ও মালয়েশিয়ার সীমান্তবর্তী জঙ্গলে অসংখ্য গণকবর রয়েছে বলে ধারণা করা হচ্ছে। মিয়ানমার ও বাংলাদেশ থেকে মানবপাচারের শিকার হওয়া ব্যক্তিদের নির্যাতন ও পরে মুক্তিপণ না পেয়ে ওই জঙ্গলেই গণকবর দেওয়া হয়েছে। এদিকে, মালয়েশিয়া সরকার কর্তৃক সম্প্রতি সেখানে পাচারকারীদের কোনো ক্যাম্প না থাকার কথা দাবি করা হলেও সেখানেও গণকবর উদ্ধার করা হয়েছে। থাইল্যান্ডের পর মালয়েশিয়ার সীমান্ত পেরলিস প্রদেশের ওয়াং কেলিয়ান জঙ্গলে ৩০টি গণকবরের সন্ধান মিলেছে। লাশগুলো সমুদ্র পথে পাচার হওয়া মিয়ানমারের রোহিঙ্গা ও কিছু বাংলাদেশির। সূত্র-ইত্তেফাক, প্রথম আলো, জনকণ্ঠ, সংবাদ, ডেইলি স্টার, ইন্ডিপেনডেন্ট, নিউজ টুডে, ডেইলি সানসহ অধিকাংশ দৈনিক এ বিষয়ে লিড নিউজ ছেপেছে।

৪। মানব পাচার বিচারের জন্য ট্রাইব্যুনাল হচ্ছে সাত বিভাগে

আইন প্রণয়নের তিন বছর পর মানব পাচারের অপরাধ বিচারের জন্য ট্রাইব্যুনাল গঠিত হচ্ছে। এতে দোষী ব্যক্তিকে সর্বোচ্চ সাজা হিসেবে মৃত্যুদণ্ড দেওয়া যাবে। প্রাথমিকভাবে দেশের সাত বিভাগে সাতটি ট্রাইব্যুনাল হবে জেলা জজের নেতৃত্বে। এসব ট্রাইব্যুনালে আলাদা বিচারক নিয়োগ দেওয়া হবে। এজন্য প্রয়োজনীয় বরাদ্দ চেয়ে আইন, বিচার ও সংসদ বিষয়ক মন্ত্রণালয় অর্থ বিভাগকে চিঠি দিয়েছে বলে জানিয়েছেন আইনমন্ত্রী অ্যাডভোকেট আনিসুল হক। সূত্র-ইত্তেফাক (পৃ.১,ক.২), যুগান্তর (শেষ পৃ.,ক.৭), ডেইলি স্টার (পৃ.৩,ক.৬), ডেইলি সান (পৃ.৩,ক.২)।

৫। ধর্ষণ ও হত্যার হুমকি রোধে দ্রুত ব্যবস্থার তাগিদ সংসদীয় কমিটির

রাজধানীতে মাইক্রোবাসে তুলে নিয়ে গারো তরুণী ধর্ষণ ও ঢাকা বিশ্ববিদ্যালয়ের উপাচার্যসহ ১০ জনকে হত্যার হুমকি দেওয়ার ঘটনায় স্বরাষ্ট্র মন্ত্রণালয়কে দ্রুত ব্যবস্থা নিতে বলেছে সংসদীয় স্থায়ী কমিটি। একই সঙ্গে পহেলা বৈশাখে টিএসসিতে নারীর ওপর যৌন নিপীড়নের ঘটনার বিষয়ে পুলিশকে সতর্ক করে দিয়ে দ্রুত দোষীদের বিচারের আওতায় আনতে বলেছে স্বরাষ্ট্র মন্ত্রণালয় সম্পর্কিত সংসদীয় স্থায়ী কমিটি। গতকাল ২৪ মে রোববার জাতীয় সংসদ ভবনে অনুষ্ঠিত সংসদীয় কমিটির বৈঠকে এসব সুপারিশ করা হয়। সূত্র-যায়যায়দিন (পৃ.৩,ক.২), যুগান্তর (শেষ পৃ.,ক.১), ডেইলি অবজারভার (পৃ.১,ক.১), ডেইলি সান (শেষ পৃ.,ক.১)।

৬। বাজেটে বিশেষ তহবিল চান আবাসন ব্যবসায়ীরা : অর্থমন্ত্রীর সঙ্গে প্রাক-বাজেট আলোচনা

দেশের আবাসন শিল্প রক্ষায় চলমান মন্দা অবস্থা কাটাতে আসন্ন বাজেটে 'হাউজিং লোন' নামে ২০ হাজার কোটি টাকার একটি বিশেষ তহবিল গঠনের প্রস্তাব দিয়েছে রিয়েল এস্টেট অ্যান্ড হাউজিং অ্যাসোসিয়েশন অব বাংলাদেশ (রিহাব)। কারণ সরকারি সহায়তা ছাড়া আবাসন খাতের ব্যবসায় চলমান চরম মন্দা কাটবে না বলে জানিয়েছেন এ খাতের ব্যবসায়ী নেতারা। এছাড়া ১৫শ' বর্গফুট আয়তনের বা এর চেয়ে ছোট ফ্ল্যাট ক্রয়ে ক্রেতাদের ৭ থেকে ৯ শতাংশ সুদে ঋণ প্রদান, ফ্ল্যাট রেজিস্ট্রেশনে বিদ্যমান গেইন ট্যাক্স, স্ট্যাম্প ফি ও মূল্য সংযোজন কমিয়ে অর্ধেক নামিয়ে আনার প্রস্তাব দেওয়া হয়েছে সংগঠনের পক্ষ থেকে। গতকাল ২৪ মে রোববার সচিবালয়ে অর্থমন্ত্রী

আবুল মাল আবদুল মুহিতের সঙ্গে প্রাক-বাজেট আলোচনায় এসব দাবি তুলে ধরেন সংগঠনের সভাপতি। সূত্র-ইত্তেফাক (পৃ.৩,ক.৬), যুগান্তর (পৃ.১,ক.৫), সমকাল (শেষ পৃ.,ক.২), ডেইলি সান (শেষ পৃ.,ক.৭), ডেইলি অবজারভার বিজনেস (পৃ.১,ক.৫)।

৭। ভারতে বাংলাদেশি গৃহবধূকে ধর্ষণ ও হত্যার ময়নাতদন্ত প্রতিবেদন দিতে পুলিশকে হাইকোর্টের নির্দেশ
ভারতে ধর্ষণ ও হত্যার শিকার এক বাংলাদেশি গৃহবধূর লাশ ময়নাতদন্ত করে পুলিশকে প্রতিবেদন দিতে বলেছেন হাইকোর্ট। আগামী ১৬ জুনের মধ্যে খুলনার পুলিশ কমিশনার ও সোনাডাঙ্গা থানার ওসিকে এ বিষয়ে প্রতিবেদন দিতে বলা হয়েছে। এক রিট আবেদনের প্রাথমিক শুনানি করে বিচারপতি কাজী রেজা-উল হক ও বিচারপতি আবু তাহের মো. সাইফুর রহমানের বেঞ্চ গতকাল ২৪ মে রোববার এই আদেশ দেন। একই সঙ্গে ওই নারীর লাশ হস্তান্তরের সময় দেওয়া যাবতীয় কাগজপত্র ওই সময়ের মধ্যে আদালতে উপস্থাপন করতে স্বরাষ্ট্র ও পররাষ্ট্র সচিবকে নির্দেশ দিয়েছেন আদালত। সূত্র-ইনকিলাব (শেষ পৃ.,ক.১), জনকণ্ঠ (পৃ.১,ক.২), নিউজ টুডে (পৃ.১,ক.১), ডেইলি স্টার (পৃ.৩,ক.২), ইন্ডিপেনডেন্ট (শেষ পৃ.,ক.৩)।

৮। রাজধানীর মগবাজারে দিনদুপুরে গুলি চালিয়ে ৩৩ লাখ টাকা ছিনতাই
রাজধানীর মগবাজারে ব্যস্ত সড়কে দিনদুপুরে দুর্বৃত্তরা বেসরকারি কোম্পানির এক কর্মকর্তাকে গুলি করে প্রায় সাড়ে ৩৩ লাখ টাকা ছিনিয়ে নিয়েছে। গতকাল ২৪ মে রোববার দুপুরে মগবাজার ব্র্যাক ব্যাংক শাখার সামনে এ ঘটনা ঘটে। সূত্র-জনকণ্ঠ (শেষ পৃ.,ক.৪), সংবাদ (শেষ পৃ.,ক.৫), ইনকিলাব (পৃ.১,ক.৪), ডেইলি স্টার (শেষ পৃ.,ক.১), ডেইলি সান (শেষ পৃ.,ক.৭)।

৯। দেশের বারো জেলায় কালবৈশাখীতে নিহত ৮, আহত অর্ধশত
দেশের ১২ জেলায় গত ২৩ মে শনিবার রাতে কালবৈশাখী বড় আঘাত হেনেছে। এসময় দেয়াল ধসে ও ঘরের উপর গাছ চাপা পড়ে ৮ জন নিহত ও আহত হয়েছে অর্ধশতাধিক ব্যক্তি। হাজার হাজার বাড়িঘর ঝড়ে বিধ্বস্ত হয়েছে। বিপুল সংখ্যক গাছপালা উপড়ে পড়েছে। কোথাও কোথাও বৈদ্যুতিক তারের উপর গাছ ভেঙ্গে পড়ে বৈদ্যুতিক খুঁটি উপড়ে পড়ায় অনেক জেলায় বিদ্যুৎ সংযোগ বিচ্ছিন্ন হয়ে পড়ে। গতকাল ২৪ মে রোববারও কয়েকটি জেলায় বিদ্যুৎ ছিল না। ঝড়ে মৌসুমী ফল, ধান, পাটসহ বিভিন্ন শস্যের ব্যাপক ক্ষতি হয়েছে। সূত্র-ইত্তেফাক (শেষ পৃ.,ক.২), সমকাল (শেষ পৃ.,ক.১), জনকণ্ঠ (পৃ.১,ক.৩), নিউ নেশন (পৃ.১,ক.৪)।

১০। বিদেশ ফেরত শ্রমিকদের কর্মসংস্থানে চাকরি মেলা
বিদেশ ফেরত শ্রমিকদের দেশে কর্মসংস্থানের লক্ষ্যে চাকরি মেলা অনুষ্ঠিত হয়েছে। গতকাল ২৪ মে রোববার কাকরাইলের ডিপ্লোমা ইঞ্জিনিয়ার্স ইনস্টিটিউটে এ মেলার আয়োজন করে বাংলাদেশ এমপ্লয়র্স ফেডারেশন (বিইএফ)। বাংলাদেশ ইনস্টিটিউট অব লেবার স্টাডিজের (বিলস) সহযোগিতায় মেলায় বিদেশ ফেরত ২০০ শ্রমিক এবং ২০টি চাকরিদাতা প্রতিষ্ঠান অংশগ্রহণ করে। সূত্র-ইত্তেফাক (পৃ.৩,ক.২), সংবাদ (পৃ.১৪,ক.৪)।

১১। দেশে সোয়াইন ফ্লু শনাক্ত, চাই জরুরি পদক্ষেপ
এবার রাজধানী ঢাকার একটি বড় প্রাইভেট হাসপাতালে মারাত্মক সংক্রামক ব্যাধি সোয়াইন ফ্লু শনাক্ত হয়েছে। হাসপাতাল সূত্রে বলা হয়; আক্রান্ত ১ জন ইতোমধ্যেই সুস্থ হয়ে বাড়ি ফিরে গেছে। অন্যজনের চিকিৎসা চলছে। এছাড়া গত এপ্রিল মাসে এবং চলতি মে মাসে ঢাকাসহ দেশের বিভিন্ন স্থানে সোয়াইন ফ্লুর প্রাদুর্ভাব ঘটেছে। তবে আইইডিসিআর এর পরিচালক মনে করেন, বাংলাদেশে সোয়াইন ফ্লুতে আক্রান্তের হার উদ্বেগজনক নয়। তাছাড়া বাংলাদেশে আক্রান্তদের কেউ মারা যায়নি বলে তিনি জানান। সূত্র-ইত্তেফাক (শেষ পৃ.,ক.১)।

সম্পাদকীয়

- ক. জনকণ্ঠ, সংবাদ, সমকাল, নিউ নেশন, নিউজ টুডে, বাংলাদেশ টুডে, নিউ এজ, ডেইলি অবজারভার : গারো তরুণী ধর্ষণ ও জাহাঙ্গীরনগর বিশ্ববিদ্যালয়ের এক ছাত্রীর লাঞ্ছনার ঘটনায় জড়িতদের কঠোর শাস্তি নিশ্চিত করার পাশাপাশি নারীদের সুরক্ষায় বিদ্যমান আইনের যথাযথ প্রয়োগের সুপারিশ;
- খ. প্রথম আলো, সংবাদ, ইন্ডিপেনডেন্ট : দেশের দক্ষিণ-পশ্চিমাঞ্চলের ১০ জেলায় পরিবহণ ধর্মঘট অবসানের মাধ্যমে পরিবহণ খাত সচল করার জন্য সরকারকে আইনানুগ ব্যবস্থা নেওয়ার আহ্বান;
- গ. ইত্তেফাক : বাংলাদেশের সামুদ্রিক সম্পদের ব্যবস্থাপনায় কমিশন গঠনসহ যাবতীয় উদ্যোগ অব্যাহত রাখার প্রত্যাশা;
- ঘ. যুগান্তর : ধর্মঘটের কারণে মংলা বন্দরের অচলাবস্থার খবরে উদ্বেগ প্রকাশ করে সমস্যা সমাধানে দ্রুত উদ্যোগ নেওয়ার সুপারিশ;
- ঙ. সমকাল : সেন্টমার্চিনে ট্রলার থেকে ৪০ প্রায় কোটি টাকা মূল্যের দেড় লাখ ইয়াবা উদ্ধার হওয়ার কথা উল্লেখ করে তরুণ প্রজন্মকে মাদকের হাত থেকে রক্ষায় কঠোর পদক্ষেপ গ্রহণের ওপর গুরুত্বারোপ;
- চ. ইনকিলাব : জনগণের সার্বিক কল্যাণ প্রত্যাশায় বাজেটে কৃষিকে সর্বাধিক প্রাধান্য দেওয়ার আহ্বান;
- ছ. ডেইলি স্টার : মালয়েশিয়ায় অবস্থানরত বাংলাদেশি শ্রমিকদের মেশিন রিডেবল পাসপোর্ট প্রদানে মালয়েশিয়ান প্রতিষ্ঠান আইআরআইএস এর ব্যর্থতায় প্রতিষ্ঠানের বিরুদ্ধে বাংলাদেশ সরকারকে দ্রুত আইনি

ব্যবস্থা গ্রহণের পাশাপাশি বিকল্প পন্থায় নভেম্বর ২০১৫-এর পূর্বে প্রবাসীদের এমআরপি প্রদান সম্পন্ন করার আহ্বান;

- জ. ইন্ডিপেনডেন্ট : ঢাকার নতুন মেয়রদের কাছে পরিচ্ছন্ন রাজধানী গড়ে তোলার অঙ্গীকারের সফল বাস্তবায়নের প্রত্যাশা;
- ঝ. ডেইলি সান, যুগান্তর : অবৈধ অভিবাসন প্রক্রিয়া বন্ধে কার্যকর পদক্ষেপ নেওয়ার পাশাপাশি পরিস্থিতির শিকারদের সমস্যাকে মানবিক দৃষ্টিতে দেখার আহ্বান;
- ঞ. নিউ নেশন : মুগদা জেনারেল হাসপাতালের স্বাস্থ্য খাতের বাজেটের ৩০০ কোটি টাকার অপব্যবহার ঘটনায় জড়িতদের বিরুদ্ধে দুর্নীতির মামলায় আইনি ব্যবস্থা নেওয়ার আহ্বান জানিয়ে সম্পাদকীয় প্রকাশ করেছে।

উপ-সম্পাদকীয়

ইন্ডেফাক পত্রিকায় প্রকাশিত কলামে কৃষকের কল্যাণে তাদের সৃষ্ট সম্পদের ন্যায্যমূল্য প্রাপ্তি নিশ্চিত করতে কিছু কার্যকর পদক্ষেপ গ্রহণ করার বিষয়ে আলোকপাত করা হয়েছে।

নিবন্ধ ও ফিচার

যুগান্তর পত্রিকায় প্রকাশিত 'প্রাথমিক শিক্ষা হোক মৌলিক অধিকার' শিরোনামের নিবন্ধে মো. সিদ্দিকুর রহমান প্রাথমিক শিক্ষাকে মৌলিক অধিকার হিসেবে সংবিধানে স্বীকৃতি প্রদানে সরকারের উপলদ্ধিবোধ জাগ্রত করতে ব্যবস্থা গ্রহণের ওপর গুরুত্বারোপ করেছেন।

#

ফারহানা/ফাহিমা/মরজিনা/বিপু/২০১৫/৯.০০ ঘণ্টা